

# Top Pop Rumantsch lantscha la segunda seria

■ (cp) **Suenter l'ediziun da sia emprima rimnada sin DC continuescha la retscha Top Pop Rumantsch cun la proxima seria. Curdin Nicolay chanta «Nüglia da nouv». Exclusiv sin Radio Rumantsch.**

Sin la cumpilaziun alternativa rumantscha «accent», cumparida la primavaira 2007, figurescha el tranter las trovaglias – il chantautur ladin *Curdin Nicolay*, cun sia ballada dal «Kindl», ina chanzun d'in discurs laconic en il tren. En ina sumeglianta tunalitat turna il giuven musicist da Bever cun sia contribuziun al nov Top Pop Rumantsch: «E schi nu naiva, lura plouva, e schi plouva fissa meglder schi navess». Cun ina poesia schlantga ed associativa descriva la chanzun in lieu nua che pauc capita, danor ils baggers che lavuran or sin ils prads. «Nüglia da nouv» di il titel apunta. Il producent *Manfred Zazzi* ha contribuì al toc la tempru ritmica dals trubadurs dad ozendi. Il groove suttastritga la frasa clav da la chanzun: «Vairamaing saja bain che chi'm manca». Tge, gliez è surlasschè a la fantasia da l'auditor – sco adina en las meglras chanzuns.

*Nüglia da nouv*

*E schi nu naiva, schi lura plouva  
e schi plouva, fissa meglder schi navess  
vairamaing saja bain che chi'm manca*

*Uoss' eschan qua fingià üna ter pezza  
i nun es nüglia da nouv, minchün chi'ns cugnuoscha  
coura sül prà lavuran ils baggers  
chi sa schi fan il paradis*

*Eu sun Engiadinais e tü m'has  
dit ch'eu guarda tais  
meis bazegner d'eir'ün paur, incas  
meis bap es sülla glüna e ma  
mamm'es sü Muntatsch  
d'ingionder voust ch'eu sa quai*

*E schi nu naiva, schi lura plouva  
e schi plouva, fissa meglder schi navess  
vairamaing esa cler che chi manca*

*No eschan qua e guardain our  
da fanestra  
tü guardast a dretta ed eu guard  
a schneistra  
coura sül prà chavan ils baggers  
sco sch'ün da no stess ir*

*Eu sun Engiadinais e tü m'has  
dit ch'eu guarda tais*

*meis bazegner d'eir'ün paur, incas  
meis bap es sülla glüna e ma  
mamm'es sü Muntatsch  
d'ingionder voust ch'eu sa quai*

**Interpret, musica & text:**  
**Curdin Nicolay**  
**Producziun: Manfred Zazzi**  
**Battaria: Muso Stamm**  
**Bass: Danny Hertach**  
**Ghitaras: Jean-Pierre Von Dach**

Curdin Nicolay, naschì l'onn 1981 e creschì a Bever, pendulescha oz tranter Lucerna e Berna. Sias influenzas musicalas partan da las chanzuns da *Paulin Nuotclà* – ses barba – e tanschan fin tar la ramur dals Nirvana. Ina pezza ha'l sunà ghitarra en ina band engiadinaisa, oz preferescha'l scriver sias atgnas chanzuns en moda da «zambregiader» solitari – cun pouca prescha per il palc.

Top Pop Rumantsch è in label per purschidas innovativas ed unicas en il program da musica da RR. Las emprimas duesch chanzuns da la retscha èn cumparidas sin il disc cumpact «Top Pop Rumantsch, Vol. I, 2005–2007», da retrair tar: Radio Rumantsch, Via Masans 2, 7002 Cuir, u: [www.rtr.ch](http://www.rtr.ch).